

կարեաց մեր՝ զբարի: Արդ զլիա՞րդ վստահացեալ վասն մեր նա զչար խօսի. ըստ գրեցելոյն ձեր՝ նենգաւոր լեզուին զի՛նչ եւս յաւելցի, բայց թէ ըստ վկայից երկուց եւ երից հաստատի: Նա ըստ ապիրատու թեան իւրում զչարն ընկալցի. դուք զչար մի՛ հատուցանէք փոխանակ չարի, այլ բարեաւ յաղթեցէք չարի, վասն որոյ առաջի ձեր միշտ նա գլխիկոր լիցի, որպէս հրամանն է մեր նպատակին Յիսուսի: Ո՞չ ապաքէն հակառակքն նախանձու հակառակէին Քրիստոսի՝ Դու զանձն քո Աստուած առնես որ մարդոյ ես որդի. ո՞չ երբեմն զահաժիժել եւ քարկոծել փութացան ազգն ժպրհի: Ո՞չ կարացիք յիշել զբանն Յիսուսի որ ասէրն. Որդի Մարդոյ երթայ որպէս եւ գըրեալ է վասն նորա ի տառս տեսանողացն յայտնի. բայց վա՛յ այնմիկ յոյր ձեռն Որդի Մարդոյ մատնեսցի: Կամ՝ Երթայք ասացէք աղուխուռն Հերովդէի՝ Այսօր եւ վաղիւն բժշկութիւնս կատարեմ եւ վաղիւն յերիր աւուր կատարիմ: Իսկ ոչ գտան նմա բարեկամք որք խրատէին զնա ծածուկ եւ յայտնի, թէ դորա մարտն ընդ ձեզ է, ահա՛ զլուխ իմ յատեան դիցի. բայց թէ ի ծերութեան ցնդեալ է որ մեզ չար կամի, կամ թէ չարակամք դորա թիւր ամբաստանեալ՝ ի նոցունց դրդի, կամ թէ արդ փոշմանեալ եւ Մեղա՛յ աւսացէ՝ Տէր մեր ընկալցի, եւ դուք թողջիք դմա՛՛ զոր Տէրն կամի: Իսկ թէ կամաւ չարախօսեցաւ եւ միշտ հակառակի՝ նորա ընդդիմութիւն առ Սուրբ Աստուածածինն վերաբերի, զի դուք նորա էք սպասաւոր. ի նա յանձնեցէք իբր զկատղած շուն զոր վերյիշեցի, եւ դուք ասացէք զԱմէնողորմ Տէր ողորմեան՝ ատելեացդ զթողութիւն եւ որ զկնի: Յետ այսորիկ եթէ զղջացեալ ոչ զգաստացի՝ կալջիք զգա որպէս զհեթանոսս, որպէս Փէթվայն է Յիսուսի:

(Ձեռ. Թիւ 1059, քղ. 69բ)